

官板

鄭志

下卷附錄
本集

尾

官版見本

			五	漢
			二	書
			四	門
			六	
二	八	〇		
册	架	函	號	類

內閣文庫			
九	五		漢
八	二		書
	四		
七	二	六	
架	册	號	類

內閣文庫			
番號	漢	5246	
册數	2	(2)	
函號	298	97	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



淺草文庫

鄭志卷下

漢鄭康成謨王孫小同編

荅孫皓曰凡自周無出者周無放臣之法罪大者刑之小則宥之

荅趙商曰楚交中國而近南夷末世行故謂之夷也

張逸問許氏異義駁衛孔悝之反祔有主者

何謂也

荅云禮大夫無主而孔獨有者或時未代之君賜之使祀其所出之君也諸侯不祀天而魯郊諸侯不祀天子而鄭祖厲王皆時君之賜也

天子而趙商問孔子稱吾學周禮今用之吾從周檀弓云所法于殷禮未必由周而云吾從周者何也
答曰今用之者魯與諸侯皆用周之禮法非專自施于已在宋冠章甫之冠在魯衣逢掖之衣何必純周云吾從周者言周禮法最備其為殷周事豈一也
中庸正義引此何必純周作何必純用之

趙商問云自啟至反哭五祀之祭不行
原注曾子問注云郊社亦然者按王制云惟天地社稷為越紼而行事何

答云越紼行事喪無事時天地郊社有常日自啟及至反哭自當避之
按此條與前卷答田瓊天地郊社至尊不可廢條大意相同正義謂趙商之意葬時郊社之祭不行何得有越紼而行事鄭謂未啟以前是無事得行祭禮郊社尊故避其日使不相妨

趙商問已為諸侯又有廢疾不在國政不在喪事而為其祖服制度之宜年月之斷云何
答云父卒為祖後者三年斬何疑
商又問為祖後者三年已聞命矣所問者父在為祖如何欲言三年則父在欲言期復無

主斬杖之宜。主喪之制。未
知所定。

荅曰。天子諸侯之喪。皆斬衰無期。

喪服云。女子為父後者。期。謂大夫士之妻。有往來歸宗之義。故喪服傳云。婦人雖在外。必有歸宗。曰小宗。

荅趙商云。自其家之宗。言宗及小宗。故知是大夫士也。諸侯夫人。父母卒。無歸寧之理。故知諸侯夫人為兄弟為諸侯者。但大功耳。東垣按此條。見禮記檀弓正義。

趙商問曰。慈母嫁。亦當為服。如繼母否。

荅曰。慈母賤。何得如繼母耶。

趙商問曰。禮母亡。則服其黨。不服繼母黨。以外氏不可二也。若母黨先滅亡。無親。已所未服。服繼母黨否。

荅曰。此所問權也。非禮之正。假令母在。本自都無親。何所服耶。權者由心。

趙商問。主喪者不除。且以今言之。人去邦族。假葬異國。禮不大備。要亦有反土之意。三年闋矣。可得除否。明為改葬。總之例乎。為久不葬也。

荅云葬者送亡之終假葬法後代□□可以難禮乎。
張逸問舊儒世本皆以孔子後數世皆一子。
禮適子爲父後爲嫁母無服檀弓說子思從
于嫁母服何

荅云子思哭嫂爲位必非適子或者兄若早死無繼
故云數世皆一子

禘祫志云魯莊公三十二年八月薨閔二年
五月吉禘閔公之服二十一月于禮少四月
又不禫云吉禘譏其無恩也閔公二年八月
薨僖二年除喪始祫太廟明年禘于羣廟自

此以後五年再殷祭六年祫故八年禘釋按

後漢書鄭康成傳所著有魯禘祫義一書此
禘祫志當卽魯禘祫義也下同

荅趙商云于禮少六月者通禫月言之也閔公之喪
僖三年乃除僖二年得除閔公喪而祫者以是喪祭
雖在前喪之內亦得爲後喪之祭故雜記云三年之
喪則旣顙其練祥皆行是也

趙商問云按許氏異義駁以爲妾子爲母依
喪服庶子爲後爲其母總麻三月按禘祫志
稱春秋魯昭公十一年夏夫人歸氏薨十三

年五月大祥。七月而禫。是得為妾母三年。經無譏文。得合下禫禘之數。若不三年。則禫禘事錯。

荅云。春秋經所譏所善。皆于禮難明者也。其事著明。但如事書之。當按禮以正之。今以不譏為是。亦寧有善之文歟。

荅趙商云。繼母而為父所出。不服也。

檀弓曰。祥而縞。是月禫。徙月樂。

荅趙商曰。祥。謂大祥。二十五月。禫。謂二十七月。既禫。徙月而樂作。禮之正也。孔子五日彈琴。自省哀樂未

忘耳。踰月可以歌。皆自省踰月所為也。

荅張逸云。未葬。以脯醢奠于殯。又如下室設黍稷曰

饋。下室內寢也。至朔日月半而殷奠。殷奠有黍稷而

下室不設也。既虞祭。遂用祭禮。下室遂無事也。

云。下室之饋。器物几杖如平生。

檀弓注。大斂奠于堂。

荅趙商曰。堂當為室。

荅趙商云。師哭諸廟門外。按此條荅詞似未全。哭師

于廟門外。本禮記奔喪之文。檀弓云。哭諸寢。正義謂

是殷禮。若周禮則哭諸廟門外。故鄭荅趙商之間。亦

以爲然也

臨碩難曰。凡國有大裁。歌哭而請。魯人有日食而哭者。傳曰。非所哭。哭者哀也。歌者是樂也。有哭而歌。是以樂裁。裁而樂之。將何以請。哀樂失所。禮又喪矣。孔子曰。哭則不歌。歌哭而請。道將何爲。

荅曰。日食異者也。于民無困。哭之爲非。其所裁害。不害穀物。故哭非禮也。董仲舒曰。雩求雨之術。呼嗟之歌。國風周南小雅鹿鳴燕禮鄉飲酒大射之歌焉。然則雲漢之篇。亦大旱之歌。攷異郵曰。集二十四旱志。

元服而雩。緩刑理察。挺罪赦過。呼嗟哭泣。以成發氣。此數者。亦大裁歌哭之證也。多裁哀也。歌者樂也。今喪家輓歌。亦謂樂乎。孔子哭則不歌。是出何經。論語曰。子于是日哭則不歌。謂一日之中。旣以哀事哭。又以樂而歌。是爲哀樂之心無常。非所以難此禮。按周禮女巫正義引此條。首句作林碩難曰。末句作非所以譏此禮。餘語悉同。○釋按後漢書鄭康成傳有荅臨孝存周禮難一書。孝存卽碩。北海人也。此條係別是一書。輯鄭志者。誤錄入之。應刪。前卷荅臨碩孟子云云一條。無難字。或可存之。然使一例登載。正不止

此一條也

周都豐鎬故以吳岳為西伯按自此以下十八條不

著與何人荅問詩崧高正義引此條而曰雜問之志首尾無次此言或有或無不可信也

朝覲四時通稱故覲禮亦朝按周禮大行人正義引

此作鄭荅志

四時迎氣于四郊祭帝還于明堂亦如之按詩我將

正義引此作雜問志

內則饗次糝周禮醢次糝又醢在六飲中不合在豆

且內則有饗無醢周禮有醢無饗明醢饗一也按此

條見周禮醢人正義作雜問志

一雞羹盛明水鳥羹盛鬱鬯是以各二尊罍尊不言

數者禘祫與時祭追享朝享等皆同用三酒不別數

可知也東垣按此條見周禮司尊羹正義作鄭志

韎韐之跗注跗為幅注亦為屬以韎韐幅如布帛之

幅而連屬以為衣而素裳按此條見周禮司服正義

作雜問志又見儀禮聘禮正義

四時治兵王自出禮記天子殺則下大綏司馬職王

建大常足相參正按周禮巾車正義引此作雜問志

三辟之興皆在叔世受命之王所制法度時不行耳

世末政衰。隨時自造刑書。不合大中。故叔向譏之。作刑書必重其事。故以聖人之號。以神其書耳。按周禮司刑正義。周有亂政。而作九刑。而云周公作者。下引鄭志。與此文同。

此公乃二王後。按周禮掌客正義。上公醢醢百二十。饗。下引鄭志。此一語。

祖爲祭道神。按儀禮聘禮記。出祖釋軼。祭酒脯。正義引鄭志。此一語。

天子之卿。其地見賜。乃有何由。諸侯之臣。正有此地。按儀禮喪服傳。正義是天子公卿大夫有采地者也。

下引鄭志。此條。

王執鎮圭以朝日。祭天地宗廟。亦執之。按禮記曲禮

正義。謂典瑞云。王執鎮圭以朝日。又鄭志云。祭天地

宗廟。亦執之。是朝日既執。鎮圭夕月亦當然也。

脯非食穀。按禮記內則。大夫燕食有膾。無脯。有脯無

膾。正義引鄭志。此一語。

月令。命民社。謂秦社也。自秦以下。民始得立社。

大裘之上。又有元衣。與裘同色。

三狄首服。副。副。覆也。所以覆首爲之飾。其遺象若今步繇矣。鞠衣首服。編。編。列髮爲之。其遺象若今假紒。

矣。展衣祿衣首服次。次第髮長短為之。所謂髮髻。若燕居之時。則亦祿纒笄總而已。其六服皆以素紗為裏。按禮記玉藻正義引鄭注內司服條後。又引鄭志此條。東垣按繇與搖通。紒古髻字。說文髻在新附。士冠禮注。古文紒為結。

春日。其帝太皞。其神句芒。祭蒼帝靈威仰。太皞食焉。句芒祭之于庭。祭五帝于明堂。五德之帝亦食焉。又以文武配之。祭法。祖文王而宗武王。此謂合祭于明堂。漢以正禮散亡。戴禮文殘缺。未審周明堂以何月于月令。則以季秋。按禮記祭法正義全載此條。詩我

將正義節引後二句。並作雜問志。

正月上辛。祀后稷于南郊。還于明堂。以文王配。按南

齊書禮志。永明二年。蔡仲熊議。郊與明堂宜異。日。據前條未審。周明堂以何月于月令。則以季秋。二語證此條非出鄭意。蓋為志者失焉。

王瓚問曰。爾雅云。莫貉。螳蜋。同類物也。今沛魯以南謂之螳蟻。三河之域謂之螳蜋。燕趙之際謂之食脗。齊濟以東謂之馬敷。然名其子。則同云。螳蜋。是以注云。螳蜋。螳蜋母也。按此條似未全。僅作王瓚問。必有脫誤。藝文類

聚所載亦同。今無從校補。○釋按禮記月令正義爾雅釋蟲正義並引作方言云云。與此畧同。惟沛魯訛作潭魯。齊濟訛作齊杞。馬敷訛作馬穀。考方言無此數語。月令正義所引當卽鄭志。不知者以意改爲方言。而爾雅正義又襲其誤也。

焦氏問曰。仲秋乃鳩化爲鷹。仲春鷹化爲鳩。此六月何言鷹學習乎。

張逸荅曰。鷹雖爲鳩。亦自有真鷹可習矣。按自此以下二十三條。竝鄭門弟子互相問荅語。引入禮經正

義。有只書某荅某問者。不盡標鄭志。

堯典竄三苗于三危。在西裔。檀弓注。舜征有苗。乃死于蒼梧。

張逸荅焦氏問云。初竄西裔。後分之在南野。漢書地理志有蒼梧郡。是今爲郡名也。東垣按蒼梧郡。元鼎六年開。

曲禮云。天子五官。注。此殷時制也。○崇精問焦氏云。鄭云。三王同六卿。殷應六卿。此云五官。何也。

焦氏荅曰。殷立天官與五行。其取象異耳。是司徒以

下法五行并此太宰卽爲六官也。鑑按此條見禮記曲禮正義

崇精問曰獄。周曰圜土。殷曰羸里。夏曰均臺。囹圄何代之獄。

焦氏荅曰。月令秦書則秦獄名也。漢曰若盧。魏曰司空。是也。侗按此條見禮記月令正義不標鄭志。

元鳥至之日以太牢祠于高禴。注曰高辛氏之世元鳥遺卵。娥簡狄吞之而生契。後王以爲媒官嘉祥而立其祠焉。○王權問曰以注言之先商之時未有高禴。生民詩曰克禴克

祀以弗無子。傳以爲古者必以高禴爲姜嫄禋祀上帝而生稷。是則高禴之祀非以生契後立之也。按以上見太平御覽標作鄭記。

釋按隋書經籍志鄭志鄭記各自爲書孝經正義云鄭君卒後其弟子追論師所著述及應對時人謂之鄭志鄭之弟子分證門徒各述所言更爲問荅編錄其語謂之鄭記史通說亦同然則諸書所引標作鄭記者不可濫入應刪或附錄于後

焦喬荅云先契之時必自有禴氏祓除之祀位在于

南郊蓋以元鳥至之日祀之矣。然其禮祀乃于上帝也。城簡狄吞鳳子之後，後王為媒官嘉祥，祀之以配帝，謂之高禱。按月令仲春以太牢祠于高禱，注正義引鄭志焦喬荅王權云，與此字句悉同。太平御覽所載必自有作自必有，然其禮祀作然其所禮。

曾子問：公館與公所為？曰：公館，注：公館若今縣官舍，公所為君所命使舍已者。○鮑遺問曰：注此云君所命使舍已者，注雜記云公所為若今離宮別館也，是二說異何？

張逸荅曰：公館若今停待者也，離宮是也。聘禮曰：卿

館于大夫，大夫館于士，公命人使館客，亦公所為也。

任厥問云：天官司裘，注云：士不大射，士無臣祭，無所擇，此云百官皆足，則有臣矣。

汜閣荅曰：此上下兼說之耳。士雖無臣，猶有屬官佐祭，特牲饋食云：公有司，私臣皆殺，胥百官皆足，抑謂此也。

郊特牲：庭燎之百，由齊桓公始也。注：庭燎之差，公蓋五十，侯百，子男皆三十。○崇朝問云：引大戴禮也，何以言蓋？

汜閣荅曰：言蓋無別意，猶如禮運云：仲尼之歎，蓋歎

魯也亦無別意

劉德問曰君弔大夫迎于門外又拜送于門外大夫弔不迎于門外今時縣令長弔主人待之當依國君來弔禮歟依大夫來弔也又當去杖其至皆如故無可捨耶又今時丞尉來弔待之當云何

田瓊荅曰今之君與禮所云君輕重不同若必欲依之令長宜依國君丞尉宜依大夫君子于禮但見去杖戢杖其餘不見也今于君弔以首經貫臂遣入則不釋之而已

陳鑠

原注一作鑠

問汜閣云為庶母慈已鄭注引

內則國君之子有子師慈母保母又曰大夫之子有食母庶母慈已此之謂也內則人君養子之法禮人若有庶母尚無服何人為慈母服乎若欲施大夫大夫無此禮但有食母耳

汜閣荅曰內則實總國君及大夫養子之禮

劉德問田瓊曰乳母總注云養子者有他故賤者代之慈已今時婢生口使為乳母得無甚賤不應服也

瓊荅曰。婢生口。故不服也。

張逸荅陳鏗原注一作鏗云。敬姜早寡。晝哭以辟嫌。帷殯或亦辟嫌。表夫之遠色也。

劉德問以爲人後者。支子可也。長子不以爲後。同宗無支子。惟有長子。長子不後人。則大宗絕後。則違禮。如之何。

田瓊荅曰。以長子後大宗。則成宗子。禮諸父無後。祭于宗家。復以其庶子。還承其父。

陳鏗原注一作鏗問趙商曰。親見尸柩。不可吉服。旣虞可除。何爲乎三月。

商荅曰。改葬總三月一時。無他變易。今旣總。無因便除。故待三月除。以順總之數。

桓翱問汜閣云。久喪不除者。爲當衆子盡然邪。故質焉耳。

荅云。昔嘗送鄭君到代陵。代陵有人。其父死。不得其屍。其子行喪。隨制降殺。閣與亡者相知。而往弔之。還問鄭所駁異義之事。不孝莫大于無後。終身不除。此爲絕先人之統。無乃重乎。鄭君荅云。庶子自可攝祭。閣覆云。無庶子。當何以。又曰。云族人可以其倫代之。閣覆又言云。無族人云何。則不復相荅。推此而詳。但

使一嫡子不除耳

劉德議問曰原注議字疑衍按杜佑通典喪引此亦作議問似非衍文

服小記云朋友虞祔而已此謂立幼而為虞

祔也若都無主族神不歆非類當為虞祔否

田瓊荅曰虞安神也祔以死者祔于祖也既朋友恩舊歡愛固當安之祔之然後義備也但後日不常祭之耳

又問朋友無所歸于我殯若此者迎彼還已館皆停柩于何所

荅曰朋友無所歸故呼而殯之不謂已殯迎之也于

已館而殯之者殯之而不于西階也

陳鏗原注一鑠問曰雜記母之諱宮中諱妻之

諱不舉諸其側也此則與母諱同何也

田瓊荅曰雜記方分尊卑故詳言之曲禮據不出門大略言之耳母諱遠妻諱近則亦宜言也但所避者狹耳

曲禮大功小功不諱○陳鏗問曰亦為父乎自己親乎

田瓊荅曰雜記云卒哭而諱王父母兄弟世父叔父姑姊妹子與父同諱謂諱齊衰親也然則大功小功

不諱矣

焦氏問曰按春秋君在稱世子君薨稱子某既葬稱子無言嗣子某者也又大夫之子當何稱

張逸荅曰此避子某耳大夫之子稱未聞

崇精問曰葬母亦朝廟否其虞父與母同日異日乎

焦氏荅曰婦未廟見不朝廟耳內豎職云王后之喪朝廟則爲之蹕也是母喪亦朝廟明也虞當異日也劉德問曰失君父終身不得者其臣子當得

婚否

田瓊荅曰昔許叔重作五經異義已設此疑鄭君駁云若終身不除是絕祖嗣也除而成婚違禮適權也

陳鑠原注一作鏗問喪服四制曰言不文者謂臣

下也注引孝經說云言不文者指士民也按坊記云高宗三年其惟不言言乃謹此則所言也又喪大記云既葬與人立君言王事不言國事大夫士言公事不言家事此天子諸侯俱有言矣而獨謂臣下上句云言而后事行者杖而起注云謂大夫士也孝經說云言

不文指士民也義似不同引之何明

趙商答曰三年之喪天子諸侯不言而事成者家宰存也雖亦有所言但希耳至于臣下須言而辨爲可謂言但不文耳各有所施不相妨也言臣下時所包者廣孝經云士民注引之者欲微見其小異其大趣亦同也

問曰或言往哭或言側室或言他室不同何也又雜記三年之喪雖功衰不弔如有服服其服而往雖總必往亦當服否

瓚答曰檀弓言往哭不言輕重通三年當往也雜記

斬衰言功衰乃服其服而往則齊衰亦于功衰乃服其服也哭他室者爲外兄弟明皆當先哭乃行耳異國則不往也

按杜佑通典引此條標作鄭記

目錄記鄭之所注五經之外有中侯大傳七政論乾象歷六藝論毛詩譜答臨碩難周禮許慎異義釋廢疾發墨守箴膏盲答甄守然等書按此條見孝經序注正義謂鄭志目錄

記鄭之所注如是以爲未注孝經之證非答

問語當是傳寫者附錄于後○侗按難周禮應

從後漢書本傳作周禮難釋廢疾本傳及各

史經籍藝文志釋皆作起。史通引此條。大傳作書傳。難周禮作難禮。許慎上有駁字。無釋廢疾三字。荅甄守然作及荅甄子然。

鄭志卷下

附錄

後漢書本傳

門生相與誤元荅諸弟子問五經。依論語作鄭志八篇。

隋書經籍志

鄭志十一卷。魏侍中鄭小同撰。

史通

鄭弟子追論師注及應荅。謂之鄭志。

孝經正義

鄭君卒後。其弟子追論師所著述。及應對時人。謂

之鄭志

舊唐書經籍志

九卷鄭元撰

新唐書藝文志

九卷鄭元撰

通志藝文畧

十一卷魏侍中鄭小同

經義考

鄭小同鄭志隋志十一卷唐志九卷佚按鄭志載于正義及通典者大抵張逸趙商冷剛田瓊昞模

問而康成荅之又有焦喬王權鮑遺陳鏗崇精弟子互相問荅之辭

四庫全書提要

按隋書經籍志十一卷魏侍中鄭小同撰鄭記六卷鄭元弟子撰後漢書鄭元本傳則稱門生相與誤元荅弟子依論語作鄭志八篇劉知幾史通亦稱鄭弟子追論師說及應荅謂之鄭志分授門徒各述師言更不問荅謂之鄭記

按通典及初學記所引鄭記均有王瓚荅詞與知幾所云更不問荅者不合考孝經疏引此文作各述師言更為問荅知不字乃為字之訛王應麟玉海朱彝尊經義攷並沿用誤本殊失訂正又通典所引鄭志皆元與門人問荅之詞所

引鄭記皆其門人互相問答之詞知志之與記其
別在此曲禮正義引鄭志有崇精之問焦氏之答
月令正義引鄭志有王權之問焦喬之答焦氏之
問張逸之答疑本鄭記之文校刊者惟據史通更
不問答之說其說不同然范蔚宗去漢未遠其說
改爲鄭志也其說不同然范蔚宗去漢未遠其說
當必有徵隋志根據七錄亦阮孝緒等所考定非
唐宋諸志動輒疎舛者比斷無移甲入乙之事疑
追錄者諸弟子編次成帙者則小同後漢書原其
始隋書要其終觀八篇分爲十一卷知非諸弟子
之舊本也新舊唐書載鄭記六卷尙與隋志相同
而此書則作九卷已佚二卷至崇文總目始不著
錄則全佚於北宋初矣此本三卷莫考其出自誰

氏觀書中禮運註澄酒一條答趙商之問者前後
兩見而詳略小異又陳鑠之名前後兩見而後一
條註一作鏗知爲好鄭氏之學者惜其散佚於諸
經正義哀輯而成然如所載弼成五服答趙商問
一條不稱益稷而稱臯陶謨則正合孔疏所云鄭
氏之本又卷首冷剛問大畜童牛之牯一條今周
易正義中不見而周禮正義引之較此少冷剛問
云以下六十餘字周禮正義引答孫皓問一條較
此少夏二月仲春太簇用事陽氣出地始温故禮
應開冰先薦寢廟五句其臯陶謨註與經典釋文

及正義所引亦互有詳略而堯典註一條乃不載正義中則亦博採諸書有今日所不盡見者非僅剽剗正義又玉海十八卷引定之方中詩張逸問仲梁子何時人荅曰先師魯人此本先師之下多一云字方知先師非指仲梁子如此之類亦較他書所載爲長足證爲舊人所輯非近時所新編也間有蒐採未盡者諸經正義及魏書禮志南齊書禮志續漢書郡國志註藝文類聚諸書所引尙有三十六條又鄭記一書亦久散佚今可以考見者尙有初學記通典太平御覽所引三條併附錄之

以存鄭學之梗概併以見漢代經師專門授受師弟子反覆研求而後筆之爲傳註其詳且慎至於如此昔朱子與胡紘爭寧宗持禫之禮反覆辨難終無據以折之後讀禮記喪服小記疏所引鄭志一條方得明白證驗因自書於本議之後記其始末有向使無鄭康成則此事終未有所斷決語是朱子議禮未嘗不折服於元矣後之臆斷談經而動輒排斥鄭學者亦多見其不知量也

四庫全書簡明日錄

鄭志三卷魏小同撰小同鄭元之孫也元沒之後

門人述其問荅爲八篇。小同編次爲十一卷。原本
久佚。此示好古者從諸書輯綴以存鄭學之崖略
者也。

二十二史考異後漢書

鄭元傳。門生相與撰元荅諸弟子問五經。依論語
作鄭志八篇。按隋書經籍志。鄭志十一卷。魏侍中
鄭小同撰。鄭記六卷。鄭元弟子撰。於此傳不合。攷
孝經正義云。鄭君卒後。其弟子追論師所著述。及
應對時人。謂之鄭志。鄭之弟子分證門徒。各述所
言。更爲問荅。編錄其語。謂之鄭記。是鄭志出於諸

弟子明矣。鄭氏門人見於鄭志與鄭記者。有趙商

張逸劉炎吳模田瓊孫皓冷剛任厥一作陳汜閣

鏗焦氏崇精鮑遺王權崇翽焦喬疑卽焦氏等。傳惟載

河內趙商一人。餘人爵里不可攷。

補續漢書藝文志。秦鑑按錢徵君大昭撰。尙未刊行。

鄭志入篇。門生相與撰鄭康成荅諸弟子問五經。
依論語作

嘉定秦鑑昭若甫錄

久依此不... 嘉安泰... 諸君... 亦無所... 徒四百餘人

亦無所... 徒四百餘人

徒四百餘人

徒四百餘人

徒四百餘人

徒四百餘人

徒四百餘人

徒四百餘人

鄭志一書范蔚宗謂鄭氏門人所集隋志等書謂其

孫小同所編近人或謂停其間以為追錄之者諸弟

子編次成帙者小同理固有之今本不知誰何所集

四庫全書提要言兩江總督採進聚珍板刊行人

間絕少首題鄭小同編則仍從隋志等書也其下卷


多鄭氏弟子互相問答語當是鄭記之文鄭志既非

全書則仿論語問文等章之例一概編之似亦無所

不可耳古人生徒既多來學者不能俱親受業每以

入室弟子轉授之親受業者為弟子轉授者為門人

如鄭君本傳云元師事扶風馬融融門徒四百餘人



升堂進者五十餘人。元在門下三年，不得見。迺使高業弟子傳受於元。攷鄭君客耕東萊時，門徒相隨已數百千人。受何進辟時，弟子自遠方至者又數千。鄭君安能一一面授之。諒亦如受學季常之故事可知矣。東垣以爲張逸、焦喬、汜閣、田瓊、趙商五人弟子也。故荅而不問。此專指下鄭記數條言。崇精崇翱、王權、鮑遺、陳鑠、劉德六人門人也。故問而不荅。又鄭志當是鄭君晚年定論，何以知之。本傳言趙商等自遠方來就學，在何進辟名之後，時年六十。茲則商所問者十居其四，是在六十歲以後也。又諸弟子所問引易注者二，是

在易注已成之後也。引書贊者一，書注者四，是在書贊書注已成之後也。引詩箋者十二，是在詩箋已成之後也。引周禮注者十七，禮記注者七，儀禮注者一，是在三禮注已成之後也。引論語注者一，禘祫志者一，駁五經異義者三，是在論語注、禘祫志、駁異義已成之後也。荅劉炎問關雎，則云論語注、人間行已久。荅靈模問匪革其猷，則辨詩箋與禮注不同之故。可知晚年定論，尤足模楷百世矣。秦君照若刊叢書，屬予勘訂，因借弟繹侗取諸經正義及唐宋說部類書所引，詳細校對，聚珍板舊有按語，悉仍其舊，新加按

典所引作鄭記者皆門人互相問答之詞獨禮記正義所引間有諸弟子互相問答之詞亦引作鄭志者疑無識之徒襲劉知幾更不問答之說遂改鄭記爲鄭志猶詩七月正義改鄭志爲吳志禮記月令正義改鄭志爲方言耳又有答臨碩難一條攷後漢書本傳有答臨孝存周禮難孝存卽碩北海人也二者皆各自爲書與此無涉原可就刪但鄭記卽係北海弟子互相問答反覆辨難以合于司農之學答臨碩周禮難亦卽司農與弟子問難之書則于鄭志體例不甚相懸且散佚已久偶有僅存附錄之均足以存鄭

學之梗概特當標出注明耳秦君照若擬刊叢書屬予第弟勘訂偶有考證特標名附注各條之下嘉慶三年六月十有六日以成錢繹書

莫示
三平六氏十有六日以風發釋書
千乘策備信跡
學之風辨神高默出主與耳秦古辨若鏡以素青國

鄭司農集

雅雨堂刊本

相風賦

北海鄭元康成撰

昔之造相風者其知自然之極乎其達變通之理乎
上稽天道陽精之運表以靈鳥物象其類下馮地體
安貞之德鎮以金虎元成其氣風雲之應龍虎是從
相妙之徵神明所通夫能立成器以占吉凶之先見
者莫精乎此乃構相風因象設形宛盤虎以爲趾建
修竿之亭亭體正直而無撓度征挺而不頽棲神鳥
干竿首候祥風之來征

伏后議

獻帝皇后父屯騎校尉不其亭侯伏完朝賀公庭完拜如衆臣及皇后在離宮后拜如子禮三公入坐議或以爲皇后天下之母也完雖后父不可令后獨拜私朝或以爲當交拜令后存人子之道完不廢人臣之義又子尊未加于父母雖曰天王后猶曰吾季姜欲令完尤行父法后專奉子禮公私之朝后當獨拜或以爲皇后至尊父亦至親交拜則父子無別完拜則傷子道后拜則損至尊欲令公朝者完拜如衆臣于公宮后拜如子不知四者何是正禮博士鄭元議

曰四者不同抑有由焉

父是違禮而無常也禮言子事父無貴賤又云子不爵父

春夏封諸侯議

據祭統云古者于禘發爵賜服于嘗出田邑今封諸侯則違古且土地皆慶賞之事漢家故事丞相始拜皆封爲國侯其在秋冬者先賜爵關內侯俟春而後封祭統嘗出田邑先師或以爲秋嘗時邑人皆田或以爲削黜田邑于此時也

戒子益恩書

恩本傳作思

吾家舊貧不為父母昆弟所容去厮役之吏游學周秦之都往來幽并沈豫之域獲覲乎在位通人處逸大儒得意者咸從奉手有所授焉遂博稽六藝究覽傳記時觀秘書緯術之奧年過四十乃歸供養假田播殖以娛朝夕遇闕尹檀執坐黨禁錮十有四年而蒙赦令舉賢良方正有道辟大將軍三司府公車再召比牒併名早為宰相惟彼數公懿德大雅克堪王臣故宜式序吾自忖度無任于此但念述先聖之元意思整百家之不齊亦庶幾以竭吾才故聞命罔從而黃巾為害萍浮南北復歸邦鄉入此歲來已七十

矣宿業衰落仍有失誤案之禮典便合傳家

別傳云夙業衰

落仍有失誤年入此歲而七十矣于禮可傳家事云云天子所不臣者三其一

后之父母也天子尚不臣況于后乎春秋魯隱公二年紀履緌來逆女冬伯姬歸于紀又桓公八年祭公來遂逆王后于紀九年紀季姜歸于京師或言逆王后義有所見也女雖嫁為鄰國夫人其尊無以加于父母嫁于天子此雖己女成言曰王后明當時之尊得加父母也紀季姜歸于京師更稱其字者得行禮而戒之其尊安加于父母耳今不其亭侯在京師禮事出入宜從臣禮若后適離宮及歸寧父母從子禮

附丞相徵事邴原駁曰孝經云父子之道天性也
明王之章先陳事父之孝女子出降其父母婦人
外成不能二統耳春秋左氏傳紀裂繻來逆女列
國尊同逆者嫌不敢自成故以在父母之辭言之
禮敵必三讓之義也祭公逆王后于紀者至尊以
無外辭無屈成言曰王后紀季姜歸于京師尊已
成稱季姜從紀子尊不加于父母之明文也如皇
后于公庭宦僚之中令父猶拜違古之道斯義何
施漢高五日一朝太上皇家令譏子道不盡欲微
感之令太上皇攤篲卻行稱臣雖去聖人遠禮文

闕然然父子之義五品之常不易之道寧為公私
易節公庭則為臣在家則為今我告爾以老歸爾
以事將閑居以安性覃思以終業自非拜國君之
命問親族本傳云之憂展孝父墓本傳云展春秋
觀省野物曷嘗扶杖出門乎家事大小女一承之
咨爾烝烝一夫曾無同生相依其最求為君子之
道鑽研勿替本傳云研恭慎威儀以近有德顯譽
成于僚友德行立于已志若致聲稱亦有榮于所
生耳可不深念邪可不深念邪吾雖無絀冕之緒
頗有讓爵之高自樂以論贊之功庶不遺後人之

羞末所憤憤者徒以亡親墳壟未成所好羣書率皆腐敝不得于禮堂寫定傳與其人日西方暮其可圖乎家今差多于昔勤力務時無恤飢寒菲飲食薄衣服節夫二者尚令吾寡恨忽忘不識亦已焉哉

易贊

易之為名也一言而函三義簡易一也變易二也不易三也故繫辭云乾坤其易之緼邪又曰易之門戶邪又曰夫乾霍然示人易矣夫坤隤然示人簡矣易則易知簡則易從此言其簡易之法則也又曰其為

道也屢遷變動不居周流六虛上下無常剛柔相易不可為典要唯變所適此言從一作順時變易出入動者也又曰天尊地卑乾坤定矣卑高以陳貴賤位矣動靜有常剛柔斷矣此言張設布列不易者也據茲三義而說易之道廣矣大矣

詩譜叙

詩之興也諒不于上皇之世大庭軒轅逮于高辛其時有亡載籍亦茂云焉虞書曰詩言志歌永言聲依永律和聲然則詩之道放于此乎有夏承之篇章泯棄靡有子遺邇及商王不風不雅何者論功頌德所

以將順其美。刺過譏失。所以匡救其惡。各于其黨。則爲法者彰顯。爲戒者著明。周自后稷。播種百穀。黎民阻飢。茲時乃粒。自傳于此名也。陶唐之末。中葉公劉。亦世修其業。以明民共財。至于太王王季。克堪顧天。文武之德。光熙前緒。以集大命于厥身。遂爲天下父母。使民有政有居。其時詩風有周南召南。雅有鹿鳴。文王之屬。及成王周公致太平。制禮作樂。而有頌聲興焉。盛之至也。本之由此風雅而來。故皆錄之。謂之詩之正經。後王稍更陵遲。懿王始受譖。亨齊哀公。夷身失禮之後。邴不尊賢。自是而下。厲也幽也。政教尤

衰。周室大壞。十月之交。民勞板蕩。勃爾俱作。衆國紛然。刺怨相尋。五霸之末。上無天子。下無方伯。善者誰賞。惡者誰罰。紀綱絕矣。故孔子錄懿王夷王時詩。訖于陳靈公。淫亂之事。謂之變風。變雅。以爲勤民恤功。昭事上帝。則受頌聲。宏福如彼。若違而弗用。則被刼殺。大禍如此。吉凶之所由。憂娛之萌漸。昭昭在斯。足作後王之鑒。于是止矣。夷厲已上。歲數不明。太史年表。自共和始。歷宣幽平王。而得春秋次第。以立斯譜。欲知源流清濁之所處。則循其上下而省之。欲知風化芳臭氣澤之所及。則旁行而觀之。此詩之大綱也。

舉一綱而萬目張解一卷而眾篇明于力則鮮于思則寡其諸君子亦有樂于是與

尚書大傳叙

蓋自伏生也伏生為秦博士至孝文時年且百歲張生歐陽生從其學而授之音聲猶有譌誤先後猶有差舛重以篆隸之殊不能無失生終後數于各論所聞以已意彌縫其闕別作章句又持撰大義因經屬指名之曰傳劉子政校書得而上之此云奏凡四十一篇至元始詮次為八十三篇載見中興書目

魯禮禘祫義

王制祀先王之法度宗廟之祭春曰禴夏曰禘秋曰嘗冬曰烝祫為大祭祫于秋于夏于冬一云于夏于秋于冬周公制禮祭不欲數乃改先王夏祭之名禘故禘以夏先王祫于三時周人一焉則宜以秋魯禮春秋魯莊公以其三十二年秋八月薨閔二年五月而吉禘此時慶父使賊殺子般之後閔公心懼于難不得時葬葬則去首經于門外乃入務自尊成以厭其禍若已練然至二年春其間有閔二十一月禫除喪夏四月則祫既祫又即以五月禘于其廟比月太祭故譏其速譏其速者明當異歲也經獨言吉禘于莊公閔公

之服凡二十一月于禮少四月又不禫云吉禫譏其
 無恩也閔以二年秋八月薨僖二年除喪始禘大廟
 而明年春禘于羣廟自此之一作後乃五年再殷祭
 六年禘八年春當禘以正月會王人于洮故經曰秋
 七月禘于大廟用致夫人然致夫人自魯禮因禘事而
 致哀姜故譏焉魯僖公以其三十三年冬十月薨至
 文二年秋八一作七月禘僖薨至此而除間有閏積二
 十一月從閔除喪不禫故明月即禘經云八月丁卯
 有事于大廟躋僖公于文公之服一云僖公之服亦少四月
 不刺者有恩也以其逆祀故特譏之魯文公以其十

六年一云八年春二月薨宣二年除喪而禘明年春禘

禘于羣廟自此之後亦五年而再殷祭與僖同六年

禘故八年禘經曰六月辛巳有事于大廟仲遂卒于

垂說者以為有事謂禘為仲遂卒張本故略之言有

事耳魯昭公十一年夏五月夫人齊歸一云薨歸氏薨十三

年夏五月大祥七月而禫公會劉子及諸侯于平丘

公不得志八月歸不及禘冬公如晉明十四年春歸

乃追而禘之至十五年春乃禘經云二月癸酉有事

于武宮傳曰禘于武公王制正義引禘志云昭十

禘不擇月定公八年十月順祀先公以陽及二十五

虎作亂求福先公特為此祭故不用常月

年傳將禘于襄公此則十八年禘八年禘至十三年禘二十三年禘二十五年禘于茲明矣儒家之說禘禘也通俗不同或云歲禘終禘或云三年一禘五年再禘學者競傳其間是用詔詔爭論從數百年來矣竊念春秋者書天子諸侯中失之事得禮則善違禮則譏可以發起是非故據而述焉從其禘禘之先後攷其疏數之所由而粗記注焉魯禮三年之喪畢則禘于太祖明年春禘于羣廟僖也宣也八年皆有禘禘祭則公羊傳所云五年而再殷祭禘在六年明矣明堂位曰魯王禮也以相準況可知也

鄭司農集

文政三年刊

官版見本

